

nostrorumque amantissimum. At enim vero cogitanti mihi de  
significando animi TIBI, *Optime Pater*, sensu, quo TVA  
causa pie nunc atque hilariter commoueor, deest, fateor, hoc  
meo officio digna, laetitiae par, consilio voluntatique meae apta  
oratio. Sed quid mirum? Nam, quoties TVOrum natalium  
sollemnior facta est recordatio (vicies vero mihi quidem id con-  
tigisse memini) in noua semper eaque aucta voluptate, laetitia,  
spe, votorum precumque assiduitate, constantia et ardore, eadem  
tamen et antiqua fuerunt verba atque formulae repetendae, qui-  
bus ne exiguam quidem aut a delectu, aut ab acumine, aut a  
compositione elegantiam addere mea passa est ingenii imbecilli-  
tas. Breuius igitur, modo hac ratione honestius eo defungar,  
quod in huius diei celebritate pietatis est atque officii, vt et  
meo, et earum, quae TE patrem suspiciunt, nomine TIBI  
optima quaeque omniaque optem, ex animi sententia succedant,  
eueniant, vt sis per innumeram annorum seriem saluus sospes-  
que, in ipso senectutis incremento, roboris maneat viriumque  
plenisimus, in hac reipublicae communi pace et tranquillitate  
tranquillior atque felicior, quam TIBI variis ad hunc vsque di-  
em infinitisque curis subactis datum fuisse videtur. Sic TVA  
nos florebimus tutela, TVA exultabimus felicitate, TVO  
fruemur etiam rerum successu, omnesque huius vrbis Ciues,  
quos TVte vehementer amare quotidiano doces probabilique  
negotiorum argumento, habebimus in TE diligendo et reue-  
renter persequendo consentientes, socios, et imitatores. Quam-  
uis enim magnopere eximieque TVAM colant, Pater, hu-  
manitatem, diligentiam et auctoritatem: hanc tamen nobis  
eripi numquam patiemur laudem, qui eadem aut maiori in TE  
sit nobis pietate, studio, voluntate et obseruantia, parem aut  
superiorem habere nos neminem, qui imitentur, plures. Quod  
TIBI de meo animo cum sit testatissimum: et amplius, vti TV  
soles, *Optime Pater*, ego etiam atque etiam TE rogo, et obtestor,  
TVA me ornare perges beneuolentia, TVO tueri patrociniis,  
meisque omnino rebus fauere atque adesse.

